

KRIZYHPA CHIAHMIE



Estd.

1926



Zisu Krista cha Abeipa a châ.
(Phil 2:10)

Monthly Issue No. 122 August 2014

Printed at the ECM OFFSET Press, Siaha
Copy - 1300/2014

EDITORIAL BOARD

<i>Editor in-chief</i>	:	<i>Rev.Dr. F.C. Beichô</i>
<i>Editor</i>	:	<i>Mrs. N.Dawhniarili</i>
<i>Associate Editors</i>	:	<i>Mr. V.B. Mokhai</i>
<i>Cir. Manager</i>	:	<i>Mr. J. Rubena</i>
<i>Members</i>	:	<i>Machâ JB.Khaisia</i>
	:	<i>Machâ A.Khailua</i>

A CHHÔH LIATA BIE YPAZY

Biepipa	Tho
Editorial	1
Thâtih la pakhypany.....	2 - 4
Dawparih chaluahpa	5 - 9
Khazoh cha kyhpachâna a châ	10 - 13
Krista palôhru	14 - 16
The Leprosy Mission Mizoram	
West Bengal Tour Report	17 - 22
Alyna bie reina	23 - 24
Machâ NC. Matlô 'L' eimâ chhaih haw	25 - 27
Machâ MC. Malsawma 'L' eima	
chhaih haw	28 - 29
Upa TH. Hmingmuana 'L' kan then ta	30 - 32

Editorial:

Hmotaopa zydua chata hnabeiseih ngaitapa ta Khazohpa sawzy a vaw luanha cha a ngiahtiah leipa ta y chheih ha tlôh ei ta (Rm 8:19). Hmotaopazy he chyhsata parao vâta chhiesana liata angia hrapa châ ei ta, Keimo molei vâta moleina a hnei leipa hmotaopazy hriena ama tao hrapa he a rarôh-y ngaita. Palôh pasa chhao â chhih ngaita.

Takô Apahrana bie achupa he eima pachâ peimawh awpa a byuh hmeihseih. Eima chheihpâh liata hmotaopa a ypazy Khazoh ta a kho ngaitapa ta a taopazy he, Khazoh mokhaoh nata palôhru ahlykheipa ta duah sai tua ei suh u. Thokô rihkô zy, chavah liata pahrapa zy nata lyurâh sa zy hi..., Keimo paraona vâta chhiena â tyhpazy heta kyhpachâtuh amâ ngiah ngaita. Mohhôhtuh, pabohsatuh châ leipa ta, riepatheituh, nôpapotuh khâ eima châ ngâthlâh ha chy aw ma?

Châ vei, ngiapâtuhzy heta ama chhâh châ bâ ei suh u. Âmo vyuhpa ta ao papua ei sihla, a paraotuhzy cha a dyuh bâ ei suh u. Awnanopa ta eima pabohsa vei khiahtala ahy e pabohsana rai a hria aw? Hmotaopazy pasatao awnha ao chata Khazohpa kô tlô ha ta, tanoh he a awnanozy miah a chhosie ngâ he zaw. Abeipa ao he nahthlie ei sihla, eima chheihpâh liata hmotaopazy chô liata zawhngiahna palâsapa ta, thaphana ao parosa bâ ei sih la, Beipa ta zawh miah â ngiah hra thlyu aw na...

*“My ta Pavawzy Khazoh reithai ei, Pawpi ta a rôhnahna palâsa tyh;
A hmotaopa ta palyuhpalih ei, Chyhsa dei lei cha pachu a ngiah vei”*

THATIH LAPAKHYPAZY

1. Lôlei Mara Church kô 10 atlohna Anniversary alyna programme ahlaopa ta Rev. P. Riabi, SES cha tari 4th Sept, 2014 liana khata sie ta, a tlâhpa ta a kaw tlô haw heih.
2. Rev. T. Salaw, ES (Misn) cha ECM Mission Field zy chahryh awpa ta tari 12.9.2014 khi ta siaha a puasai. Ano raohpa ta Machâ N. Riakô nata Machâ A. Khailua zy chhao Mission sôh Audit awpa ta ama sie hra. Rev. T. Salaw ES (Misn) ta Mission Field a chahryh chhôhta Rev. P. Riabi, SES ta ES (Misn) incharge a la chy aw.
3. Amôtlâh Awnano ta tahmâ no he Rev. K. Beisa Speaker ta hmâpa ta Camping a chhâh thôhna ama hnei ngâhai. Thlahchhâ bao ei suh u.
4. College vaih Awnano ta Sept. 15, 2014 tawhna khata Thyutliazy châta Crusade pachhuahtpanoh ei ta, Rev. Henry C. Lalenkawla cha Speaker châta hmâpa a châ.
5. Pihnô S. Nasia w/o Mission Pastor K. Dyukhu, Mishing Field, Assam cha tlâh leina vâta Shillong liata Dr. Pawsa nah nôvah ta ama mohhôn ngâhai. Thlahchhâkhei suh vy.
6. MBH hawti Lalremruati nata Omeri zy Aizawl lâ Checkup awpa ta ama siepa cha Dawty ryhpaoh leipa vâta kaw kua chy ei ta, tari 12. Sept liana khata N. Tialkimi, House

Mother nata laihsa Rebecca zy ta ama siekhei heih. Thlahchhâ bao ei suh u.

7. Khaw lâchhâh pha leina vâta EMM Channel a phathipa ta a pua thei leipa pei eima tah ngaita. Awnanozy pachâthaina eimâ haw.

8. Ahawna. ECM Revival & Evangelism ta chakaona raihria nawpa ta Motor peimawh ngaita ta, Rs. 5,32,502/- hmô hapa châ ta. Rs. 2,00,000 (Two lakh) peimawh chhipa châ ta. He châna heta Local Church ngâ viapazy hnohta ahawna taopa a châ. Ngiachhiepa ta he ahawna he hlao patloh chyu awpa ta ahawpa nama châ.

9. ECM & CCIM Joint Literature Committee liata eima pawhrâhpa Machâ Dr. S. Hrachu ta rôhnahna râh lâ miah a siesai hapa vâta a chakaona chaichamâhpa pazao awpa ta Machâ A. Zakia, Siaha vaihpi raopa nata ahawpa achâ.

10. Tahmâ no he India sawhkhâ ta Biometric Enrolment (nothlahpa chhaota ID Card taona) hmahla ngâhai ta. He he su thokha liata Sahrâhpa Nuby 666 hawhta pachuna y ta, he he bie do leipa a châ tahpa awnnozy ta eima pahno chyu awpa ta eimâ pahnosâ.

11. Takô 2014 Sunday School exam nawpa daihti cha 23rd November a châ aw. Beginner – Senior Dept taihta mopâ leipa ta a exam awpa châ aw ta, Pitlohpa deikua a bu mopa ta / Open exam heih awpa a châ aw. Sunday School Report

form nata palyupalihna a dao thei awpazy cha September thla chhõhta pangia khai awpa ta pahnosapa eima châ.

12. Puhpa L. Khuly, Computer Operator, ECM Press & Book Room cha Dt. 19–30th Sept, 2014 chhõhta Meisakõtlah (Myanmar) KTP zy Hla pachu awpa ta a sie.

13. Pro Pastor VBH Sathei Thlyutha, Pro. Pastor Teichinthang, Laihsa Merina K. Beinõpha, Laihsa Damari P. Hlychho nata Pihnõ B. Merabi zy cha SIMCO (Serving in Mission Candidate Orientation) course 10th Sept, 2014 khata a pha kawpa ta ama patlõ.

14. Laki Pastor Bia chhõh liata Awnanopa py thõh ECM, UPC nata PCI (M) apahlyhpakhypa ta Crusade & Camping Sept. thla thaona tawhna khata atahmã taihta ama hnei pazao lymã. Speaker Evan S. Zamo nata Director Evan C. Kisa zy ama châ.

15. ECM Biatuh Pastor zydua October thlachhãna liata Final report tao awpa a châpa vãta Pastor Diary report a chatlie viapa ta pangia khai awpa ta pahnosapa ama châ.



DAWHPARIH CHALUAHPA
(Maluhreina 21:9; Zawhana 3:14)

Machâ Dr. S. Hrachu

Izarel sawzy Izih sei tawhta puapa ta râhtaipa Kana râh ama pangai no khata amâ ngiahpa torai Mawsi ta Khazoh lâta tlôkheipa lymâ ei ta. Phiraoh nata Mawsi ta hrie nawpa chôchâh kyh liata amâ chhohia tyh no chhao kha, Khazoh tawhta hriena amâ tyhpa zydua kha Mawsi ta Khazoh lâ a hiah nahta hriena kha chalihsapa a châ tyh tahpa Biehrâi liata hmôpa a châ lymâ. Chadeikua Horep tlâh liata Izarel sawzy parih pachu pasapa chi ta a pachu pao no ei ta thata ama thi no khata, chhihtuh Mawsi hnohta parihzy kha papaisapa awpa ei ta Khazoh lâ hiapa awpa ei ta a haw chaimâh ei ta. Mawsi chhaota ama hiapa hawhta parihzy cha papaisa awpa ta Khazoh lâ thlahchhâ ta.

Chadeikua Izih nawh hriena liata Mawsi ta Khazohpa lâ a hia nahta hrienazy â chalih hapa hawh khata châ khao leipa ta. Dawhparih nohtthlah taopa ta, cha cha ratlyh ta chaluahpa ta, cha Dawhparih chaluahpa a mohpa maihta ama tlâh (hroh) aw, tahpa Khazoh achhyna tlao vaw châ syulyu ha ta. Zawpi hnabeiseihna nata Khazoh tawhta achhyna ama daopa cha a hlie syulyu ha ta, zawpi ama hnabeidy kaw nahta pangiasa â chhih kaw. Izih mo hriena kha Mawsi thlahchhâna vâ khata chalihsapa châ tyh tlôh ta, khâpa vâta Izarel nawh hiana he ama hiapa hawhta achhupa a châ vei tly i?

He he Idah pasana avaw pikheipa chyhsazy châta Khazohpa hmo a chhuahh thaby chaipa â lâ papua nawpa ta Khazohpa hmotao noâhchhihpa cha a châ. Izarel nawh châ dei châ leipa ta, he parih nohthlah chaluah awpa ta biepiepa he khizaw chyhsa zydua châta Khazoh hmo a chhuahpa â lâ papua nawpa thabypa nata â thaona, Hrohsopazy hmâpa ta a paphuahsa chhielie hapa zydua a tlôpaki nawpa â thaona cha a vaw châ. *“Mawsi ta Dawhparih a chaluahpa hawhna khata chyhsa sawchapawpa chhao chaluahpa a châ hra aw.”* (Zaw 3:14)

Q. Khâpa vâta parih ta a pachupazy tlâh thei nawpa ta parih nohthlahpa cheingei mo awpa ta ahnawpa ama châ?

Ans: (a) Idâh pasana hri a ohpa zydua tlâh nawpa ta cha moleina papaisapa awpa châ leipa ta, Zisu deita a ngiapâpa ta mo awpa a châ tahpa a pamosa.

(b) Kha parih chaluahpa kha parih lyu kaw hra sala, parih hmeihseih châ leipa ta, parih pie zie/pilâ (shape) alyupa deita a châ. A pôhpa cha hmosôhpa Dawh a châ hri. Bei Zisu chhao moleipa ta reipa châ hrasala ano liata moleina rai a hnei leipa, Khazoh pathaihpa tlaa a châ. Kha daihti no khata cha ‘dawh’ he hmo sôh ngaitapa châ ta, khazoh amâ chhyina chhaichhi hmobaoh chhao dawh ta taopa sai rô hmâpa a châ.

Q. Izarel nawh kha khâpa vâta ama tlâh nawpa ta Dawhparih chaluahpa kha a moh khoh leipa ma ama châ?

Ans. (a) Amo pachutuh nata pasasatuh parih nothlahpa tlai tlâ nawpa ta mo awpa cha zo thei leipa ei ta, a hao ei ta, mo awpa chhao ama ngiaroh hra. Parih pachu vâta apasapa châ ei ta, cha liata tlâh nawpa châta parih lilaw mo heih awpa cha ama châta a py awpa a ru. Moleipazy hro/tlâh nawpa ta Zisu chhao moleipa ta rei awpa byuh ta; chavâta lah chyhsa hluhpi ta angiapâ tlâh awpa ta ama pachâ leipa a châ hra.

(b) Thokha cha mo awpa ta nawhtawna hnei ei ta, a panawh thei veih ei. Tahmâ chhao â hmô sâhpa vâta angiapâ tlâh lei awpa ta Zisu a hmôpa eima hluh kaw hrapa a châ.

(c) Parih kha khakhaipa hawhta ama pachâpa vâta mo awpa ama ngiaroh. Tahmâ chhao Zisu he chyhsa hluhpi ta cha khakhaipa ta ama mopa vâta ano angiapâtuhzy taih ahao ei ta, taolapa ta nata mâty taih pachâsapa ta thata hrona ama pahleisa hai hra ei.

(d) Parih châmaih vâta thi awpa châ ei ta, Idâh moleina â vaw thaona cha parih kha chhaichhi ta hmâpa châ ta, moleina he parih tawhta â vaw thaopa a châ tah thei awpa châ ta. Parih nothlah lilaw ta patlâh awpa cha Khazoh hmochhua hpa châ ta; chavâta moleina liata pao chiehpany pathyu heih nawpa ta molei pachaipa ta reipa Bei Zisu kha khizaw molei phaohtuh awpa ta pamosana a châpa pahno leina vâta a châ.

Q. Dawhparih mopa ta tlâhpazy kha Dawhparih ama

mopa vâta a tlâhpa ma ama châ ma, Dawhparih liata tlâhna a ypa vâta maw?

Ans. Ama mopa vâta ama tlâh tah thei awpa a lyu kaw. Chadeikua ama mopa vâta atlâhpa ta pachâpa châ mawhsala ama mona ty ta a châ ha awpa a châ. A moh khoh leipazy cha thi tlai ei ta, atlâhpazy kha parih chaluahpa ama mopa vâta atlâhpa tlai ama châ hra. Chadeikua ama tlâhna chhâpa cha Khazohpa ta, “ A mohpa maih ama hroh aw” tahpa ta a rei hapa BIE vâ khata ahrohpa ama châ hri. Dawhparih kha chyhsa hropa ta taopa châsala ei hrawh hmahta moh chanei ngâkaw hra ei sala tlâh khei veih ei tah t’u. Thohna chhao he eima niepa vâta atlâhpa ta reih tyh pi ta; eima niepa vâta atlâhpa châ leipa pi ta, thohnapa liata tlâhna a ypa kha eima tlâkheipa a châ hri tah t’u. Keimo chhao eimâ ngiapâpa vâta ahroh awpa ta â pachâ thei pi ta; chadeikua eima hro chhâna cha Krista vâ deita a châ. Khatlu ta thohna phapa nata mâ rupa châ hrasala tlâhleipa ta a nie khoh vei khiahcha tlâ a thi awpa a châ. A nie khoh leina maoh cha ano ta a phaoh awpa a châ.

Parih papaisapa awpa ta ama hiapa papaisapa leipa ta Dawhparih chaluahpa ama tlâh nawpa ta piepa tlaoh a châpa hawh khata, Idâh pasana thi khei awpa moleina hrichhie eima vaw pikhei hapa he thlahchhâna ta zy, keimo hmopha taopa vâta zy nata tah theina zy ta papaisa thei awpa châ leipa ta. Molei chaipa nata hro tlâh lei awpa ta ama pachâpa Mopathaihpâ, Adopa, Ano liata moleina rai ahnei leipa angiapâpa nata mopa deita eima hroh hra aw tahpa pasiasa ta, Ano liata tlyzaw hrona y ta, cha hrona

cha eimâ hlykhei hra awpa dei a châ. Parih châmai h tâh nawpa ta parih lilaw chaluahpa a châpa hawhta moleina vâta athi awpazy tâh nawpa ta Beipa Zisu cha molei pachaipa ta reipa ta tho liata chaluahpa a vaw châ ha hra. Cha cha nâ nah kei châta a châ. Tho kraws liata thai eima châ thei nawpa ta a hrona eima châta ahlâtu hpa hnohta eimâ lyzie hla ta sa tua suh vy. Beipa ta areihtuhpa zydua hnohta Thlahpa mopavâna miah pie chyu mawh sy, AMEN

*“Ei molei Kraws chô lia ei Beipa ta phaoh ta,
Khazie ta hluh chhao â ngiahthai khoh;
Pachârôh rei thei lei tao ta Kalvari lia,
Ei molei ty na thôpa khai haw.”*

Note: (Machâ Dr. S. Hrachu he Krizyha Chaih mie liata Article zy khâ miah thyupa tyhpa châ ta. Dated 6th September, 2014 khata a chakao tyhpa Beipa o lâ miah â di sai haw, a thâ eimâ ngiah ngaita. KC châta a Sermon hnôh chaipa he palôh hmeihseih ta nama vaw rei chyu awpa ta ano vyuhpa ta ei châ haw ei. Ei parâhpa ei cha vâ kache ha...na hnohta rei khohpa hluhpi ei hnei...)- Editor



KHAZOH CHA KYHPACHÂNA A CHÂ

(1Zaw 4:16b; Rm 5:8; Zaw 15:13, 3:16)

Heili T. Azyu

Zonuam, Aizawl

1. Khazoh ta kyh miah pachâ ta, khizaw kyh a pachâ tahpa he pathipalôh hmeihseih ta eimâ pyh ma? ‘Ei nâ nata ei pâ ta kyh eina pachâ ei’ tahpa hawhta palôhru liata a y ma? Khazoh he chyhsa duahmo tawhta thlie a nao kaw. Chyhsa cha uava hmâhpa, keimo ngalâh apachâpa, paru ahmâhpa nata aphei ahmâhpa châ pi ta, chahawhta mohropazy chhao châ awpa ta eima soh khoh kaw. Khazohpa ta moleipazy kyh pachâ hmeihseih bao vei, ama hrozy ro ei sala Khazoh ama pangai nahta Khazoh ta kyh a pachâ nahta eima pangiasa. ‘Moleipa eima châ thlâh ha nota Krista ta keimo vyuhpa ta athipa vâna khata’ tahpa he eimâ pyh ma? Moleipa eima châ thlâh ha nota Khazoh ta kyh miah a pachâ chu! Kyhpachâna he Khazoh châna/zie (nature) a châ. Râhsa; chakeih, chavyh nata, sahroh; mie, viahchao zy chhao he zie (nature) ama hnei. Khazoh yzie cha kyhpachâna a châ. Chyhsa ta cha ama hrozie pha ta ama sia khiahta cha ama kyh eima pachâ, ama molei khiahtala ama kyh pachâ hlei ma pi. Khazoh nôchâ la chata châ vei, Khazoh kyhpachâna he a thu ta, avâ hlâta a sâh via ta, tilai pi hlâta kawh via ta, molei âthu chaina su chhao a tlô thei. Khazoh ta moleina â hao, châhrasala moleipa kyh a pachâ, nâ molei kawpa chhao tlai kha Khazoh ta na kyh a cha pachâ.

Khazoh kyhpachâna rôhnah zie, Bie nah hla ta chho khai thei vei;

Â sâh zie nata a kaw zie cha, Molei zoh chaina chhao tlô thei;

Molei sei pachârôhzy châ, A Sawchapaw pie haw;

Leidia sawzy thatlôna pie, Ama molei ngiahtai.

A thu ta hy a sâh kaw dia, Khazoh kyhpachâna!

Chhâzaw chhaota lo beih aw vei, Va angelzy hla cha.

(KHB No. 34)

2. **Kyhpachâna anano beih leipa ta kyh a pachâ.**


Zisu ta he khizaw he puasaipa ta Paw lâ a sie daihti a tlô haw tahpa pahno ta, ano chyhsa khizaw liata a ypa kyh a pachâ tyhpazy cha a chhâna taih chhaota ama kyh pachâ ta (Zaw 13:1). Pity ta â paphasai awpa zy nata Zuda Iskari ta a patusa awpa zy a pahno thlâh ha. Châhrasala a kyhpachâna anano beih leipa chata kyh khâ pachâ ta (Is 49,14,15,16). Zaio chata, *“Beipa ta miah pathlua ta, ei Khazoh ta eina my haw tah ta, chanô ta a sawchapawpa a chhi tawhta a puapa cha ngiachhie lei awpa ta a saw sâhpi a pazy haipa cha a my thei ma? chazy chata ama y thei; châhrasala kei chata cha my aw va na, moh tua ei kupazahzy liana heta ei cha roh hi, ei ku pachhôzy cha ei hmiakô liata y tyh ta, ei cha vaih tyh na”* a tah. A patusatuh Zuda Iskari chhao kha a kyh khâ a pachâ. A patusa awpa zâ khata (Mt.26:24) *“Chyhsa sawchapaw a patusa awpa chyhsa cha a hu a po kaw na, cha chyhsa cha pih leipa sala a châta tloa a pha via aw”* tahpa ta â chhy. A kyh a pachâ vâta a chô liata hmo rarôh-y kawpa a tlô awpa kha a pahnosa chhielie (warning)

3. *“Kyhpachâna chhâ leipa ta kyh cha pachâ na ta, chavâta thaphana ta ei châ di kheî (Zer 31:3- everlasting love) zawhngiah ngaitana chôta ei cha chhih lymâ aw.”* Kyhpachâna chhâ thai leipa ta na kyh ei cha pachâ tah ta. Chhâzaw tlyzaw ta kyh ei cha pachâ tah ta, reihkah ta kyh ei cha pachâ tahpa he y ta, hmotaopa a hlao leipa ta reihkah ta reipa ta cha palôhru hria hmeihseih vei. ‘Khazoh ta khizaw kyhpachâ ngaita kaw ta’ tahpa liana heta chhâ ha sala, cha kyhpachâna cha a ki vei. *Chatanachata a sawchapaw hnei chhôhpa pie ta, ano angiapâpa maih cha leidia leipa ta, chhâzaw hrona tlaô a hnei nawpa ta.”*

4. A Sawchapaw hnei chhôhpa pie. Sawchapaw pano pathôh tawhta pakha pie hmah ta rei ta, a hnei chhôhpa piepa chhochhi cha a ru chaimâh! A hmo hneipa zydua liata sôh chaipa cha, cha hlâta sôh viapa y khao leipa a hrona miah piepa hih! He hena a kyhpachâna pahnopasiatuh penawh ta cha ‘Bie nata hla ta reih khai thei vei, â thu nata â sâhzie cha’ tahpa ta hla ta ama phi. Kraws liata Krista a tao ngâhaipa a hmia sai tua; moleina rai a hnei leipa khata nâma nata keima châta hloh lakho a kho ta, thisaih loh tlaolao ta a tao, a hrona a hlâ ha chu! Bei Zisu ta, *“Chyhsa ta viasa châta a hro a pie hleikhô ta kyhpachâna pasa viapa ahyhmah ta hnei veih ei”* a tah. A hrona taihta hlâ hapa ta kyhpachâna cha a rôhna h kaw dia! Rôhna hna Beipa thina Kraws ra sai nota Krista na châta a tao ngâhaipa hmia na hmô ma? na châta thi ta, a hrona a hlâ haw, noâh â chhih kaw dia, *‘Pachhatuh ngiachhie ei pahno, kyhpachâna noâhchhihpa cha.’* Isai 63:9 liana cha

“Ama nôpona zydua liana chata ano cha a nôpo tyh hra ta, vâlyuhchâpa tlyma, lyuhchâpa tlyma châ leipa ta, ano flaita âmo cha pachha ta, a kyhpachâna nata a ngiachhiena ta âmo chatlai haw ta. Hlâno no zydua liana chata âmo pi ta, âmo â pyh tyh.” Nôpona pachârôhna liata miah a taokhei tyh. Pawla ta Krizyhyz a taola nona khata *‘Krista na taolapa Zisu na ei châ’* a tah khawh. Ano angiapâ penawhzy ama taola nona cha Krista ta a taokhei hra ei. IZaw 4:10 liana cha, *“He liana heta kyhpachâna a y, keimo ta Khazoh kyh eima pachâ tahpa châ leipa ta, ano ta kyh miah pachâ ta, eima moleinazy reihpha cheina châ awpa ta a sawchapawpa a vaw tuah.”* Eima moleinazy reihpha chei nawpa ta a sawchapaw a vaw tuah ha chu.

Isai 38:17–Hezekia tlâh leipa ta a vaw tlâ nah khata *“Nâ chata ei hrona kyh na pachâ vâta paraona khaohlô tawhtapa cha na pachha haw chi ta, ei moleina zydua kha na hnôh lâta thy khai ha tlôh chi ta, ei moleina zydua nâ ngiahthai ha chi ta”* a tah chu, zydua zydua â ngiahthai. Zawhana 6:35– Zisu ta, *“Kei he Hrona viahchhâ cha ei châ, ahyrai ei hnohta â vypa cha a nodi aw vei nâ ngiapâpa cha khatita hmah a dâhphi aw vei...paw ta eina piepa maih ei hnohta amâ vy khai aw, ahyrai ei hnohta â vypa cha papua (dytha) cheita aw va na.”* Khazoh ta kyh miah a pachâzie he pahnopâ ta ano thlai pangai teh.



KRISTA PALÔHRU

Machâ Pasa T. Azyu

Mara Awnanozy Thâtîpha a vaw tlô tawhta kô 107-na sie ngâhai pi ta, Awnano hâtîpa châ khao ma pi, uhthei nata pitloh duasu liata eimâ duah haw. He hawhpa duasu lia eimâ dua nota Local Church tawhta Headquarters level taih eima moh khiahla eima dâhphi pai thei-âh thlyu vei. Awnano Election vâta buana a tyh pi ta, meeting liata eima pachâna hawh a châ vei khiahla Awnano hro lâ taihta pua awpa khoh pi ta, chhihtuhpa nata chhihtuh likawh zy, angiapâtuh atahpa sahlao liata zy a hmô thai leina nata a chhyh thai leina hluhpi a y tyhpa he eima pazîpa, eima luh chaipa **Krista palôhru** eima pahnopasia lei vâta a châ khiah ma i tah theipa a châ. Pawla ta cha, *“Keimo deikua Krista palôh eima phaoh”* (IKor 2:16) tah ta. Eima chakao haipa Zisu cha ahy ma a châ? Krista palôhru cha khâpazy ma tahpa he pachâ khoh tua ei suh u.

Bei Zisu he a vaw pi hlâ kô 700-800 tawhta a vaw pi nawpa Hrohsopazy ta vaw phuah chhielie ha ei ta, Ano cha chyhsapa a vaw châ hlâta a y hapa (pre-existence) a châna zie Zawhana 1:1 liata a sia kawpa ta palâsa ta. *“Athaona liata bie a y, bie cha Khazoh hnohta a y, bie cha chyhsa hrohpa lâta â vaw lie”* (1:14) a tah. Sapa lâta â vaw liena (Incarnation) he Grik reih ta cha **Sarki** tah ei ta. A sapa kyh lâ cha Zawsi nata Mari pathlapa châ ta, a thlahpa kyh lâ deikua Khazoh sawchapawpa a châ. Zisu moh reina

he Bible liata ei 134 a y (Eg. Immanuel, Chyhsa sawchapaw, Beipa, Lâthlôh, Hrona, Khaihna etc) Zisu tahpa he alâluah chaipa châ ta, Grik reih ta **Jesous** tah ei ta, Hebrai nah ta **Jeshua, Jehosua, Joshua** ama tah. A yzie cha **"Khazoh he Pachhana"** tahna a châ. Bible liata Zisu tahpa he ei 905 rachhôn a y ama tah.

Bible tawhta Krista palôhru cimâ laichadai theipazy:

1. Kyhpachâna palôhru a hnei
2. Hmiahao nata khakhaizy kyh a pachâ (Mt 6:44)
3. Leidiazy kyh a pachâ (Lk 15:1-10)
4. Nawhna hro hnei awpa (Mt 23:11)
5. Nônaina hro hnei awpa (Mt 5:5)
6. Adyhna nata aryhna palôhru (Mt 5:9)
7. Viari thô lei awpa (Mt 5:39)
8. Hawtizy kyh a pachâ ngaita (Mt 26:42)
9. Reingiahna palôhru a hnei (Mt 26:42)
10. Riethei nata dyhchhiezy kyh a pachâ (Lk 4:18)
11. Angiahthaina palôhru a hnei (Mt 18:22; Zaw 8:11)
12. Riethei taona palôhru (Lk 9:23; Mt. 10:39)
13. Ngiachhiena palôhru (Mk 7:13)
14. Khazoh nata khizaw chakao pabaoh lei awpa (Mt 6:24)

15. Chyhsa sei lei awpa (Mt 7:1)
16. Khazoh a châkhei lymâ awpa (Mt 10:32)
17. Pathipalôh pathaih awpa (Mt 23:25-28)
18. Hmô heih awpa hnabeiseih hneipa ta tao lei awpa (Mk 7:36)
19. Ngâchhahna palôhru (Lk 12:41-48)
20. Palôhru hmeihseih ta angiapâ awpa (Mt 23:25-28)
21. Mo hropa châta byhnâ châ awpa (Lk 10:33)

He hawhta a châ nota Sata palôhru deikua cha Awnano chyhsa parao nawpa ta cha Awnano chyhsa pyly chhaichhi ta hmâh tyh ta, paraopakei awpa nata a pha leina maih he a palôhru châ ta, thyutliazy sapa nata thlahpa raokei nawpa ta ama kho chaipazy chhaichhi ta a hmâh tyh. Chavâta angiapâtuh eima mopakha chyu liata Krista palôhru hawhta eima phaoh ma tahpa a moh pasia ei sihla. Pawla ta cha *“Ei hâ nâ latuhzy châ teh u, kei chhaota Krista ha alatuh ei châpa hawhna hra he ta”* (IKaw 11:1) tah ta. Philipi 2:5 liata *“Krista Zisu liata palôhru pachâna nama hneipa hawhta nâmo hry lia chhaota hnei teh u”* tah ta. Chavâta **Krista palôhru** keimo nata eima chyhsa heih liata palâsa lymâ a byuh. Beipa ta byhnâ pie mawh sy, AMEN



Report:

**THE LEPROSY MISSION MIZORAM
WEST BENGAL TOUR REPORT**

Machâ MC. Pabei
Executive member, TLM,
Siaha Chapter

The Leprosy Mission Mizoram nata Promotional Secretary Rev. Lalzarliana phahnai- ngiahna zawhzi ta Dt. 10-15 December, 2013 liana khata TLM Committee Mizoram nôpawpa nata Chapter nano nanopa vyuhtuapa manôh 18 zy ta West Bengal State liata TLM su peimawhpa nata ama chakaona raihria ziezy hmôkhei awpa ta Rev. Lalzarliana nata Upa H. Thangzuala chhilhthapa ta eima sie.

Dt. 10.12.2013 zâlâ daw 2:30 Pm liata Lengpui Airport tawhta Air India liata manôh 9 a zaw tua ei ta, 3:20 Pm liata Jet Air ways liata manôh 9 cha a zaw heihpa a châ. Kolkata Airport liata zâlâ daw 5:30Pm liata a hmôpakhy khaipa ta, TLM liata hriatuh pakha ta miah vaw dy ta, Bus ta Howrah Train Station pangaipi ta chalia ta zâpati eima nie. Zâ daw 11:00 Pm ta Train lia siepa ta Bankura su pangaipa châ ta, my daw 4:30 Am ta Bankura Centre cha eima tlô haw. Hriatuhpa sahlaozy ta Coffee nata viahchhâ pahâh kawpa chhaota miah vaw mokhâh ei ta, ama hmiazy eima vaw hmôpa cha eima rietheinazy a vaw pai khai haw.

Bankura liana heta Mercy Home nata Vocational Training Centre hnei ei ta, Campus-zy chhao ama hnei pha

kaw. Anodeikua ama Building sahlaozy deikua mohhôn nawpa phusa rairuna vâta a ry kaw bâ. Dt. 11.12.2013 my daw 6:30 Am liata ama Chapel liata Mizoram TLM team zy chhao ta alyna bie reina nata ahlâ pathiehna thlahchhâna programme eima hmâh. My daw 7:00 Am liata phawhpa sahlaozy amâ pakhyina daihti liata keimo chhao ahlaô hra pi ta, Rev. Lalarliana ta Abeipa bietapa reih ta, Krismas hla, “*Khizaw ly nawpa a vy ta*” tahpa hla kha memberzy ta Mizo reih ta eima sa hra. Bankura TLM Centre he Kolkata tawhta KM 190 rahchhôn ahlapa a vaw châ. Purulia Centre he KM 400 rachhhôn ahlapa a châ hra.

Bankura Vocational Training Centre duasu.

Vocational Training Centre ama paduana chhâpa he phawhpa hri a vei hapazy ama nô nata paw, chhônkhazy ta o lâ a vaw di/pangai heih awpa ama pasai khao leipa sahlaozy ta nie tlua nawpa rai ama hmô thei nawpa châta paduapa a châ.

- (1) Mechanic & Diesel engine workshop: Kô 1988 liata paduapa a châ. Achuhaipa 19 ama y.
- (2) Knitting & Tailoring achuna: Kô 1988 liata paduapa a châ hra. Achuhaipa chanô 17 y ei ta, kô 19 ry lâ sai ama châ.
- (3) Information & Technology achuna: Kô 2005 liata paduapa a châ. Achuhaipa 13 ama y. General Institution chhao 10+12 taih ama hnei hra.
- (4) Welding (thua hmâpa ta hmo taona su. Kô 2005 lia paduapa. Achuhaipa 16 ama y.

Vocational Training Centre mohhôn nawpa châta kô kha ta Lakh 59 châ ta, Mercy Home châta Lakh 29 a châ hra. Sawhkhâ ta baona tlaw kha chhao a pie leipa vâta, Awnanopazy ta TLM chakaona sôh he amâ pahniehna tlâ a vaw châ. He su a tlytuhpazy châta alychhih kawpa cha, phawhpazy ta chysia ama biepa nata ama phiehpazy cheingei chaleipa ta eima hmâh theipa heta palôh lia alyna miah a pie kawpa ta ei pahno.

Bankura Mercy Home duasu. Mercy Home he Building sâno hnei ta, o chyh viapa liana heta machâ a thi tua awpa tah sila â do thlâh thlyu aw, chahawhpa sahlaosona su châ ta, o lai viapa liana heta thyutlia viapazy sona su a châ. Home liata a ypa zydua cha: chapaw 21, chanô 20 nata hriatuhzy 26 ama châ. He phawhpa hri a vei hapa sopakhypazy châta cha ama khizaw he vaw buah ngaita ta, ama Campus chhôn liata hrochhôn daihti hmâpa ta thi a hâ thlâhpazy ama châ. Cha sahlaozy nata thlahpa pachha awpa ta keimo nata eima râh Awnanopazy heta eima nainô bân sô khiah maw tahpa pachânazy ta ei palôh liata â vaw ngia ngâkaw.

Dt. 11/12/13 zâlâ daw 2:00 Pm liata Bankura puasaipa ta Purulia pangaipa ta Motor ta sie pi ta, Bankura tawhta Purulia he KM 210 rachhôn ahlapa châ ta, zâlâ daw 4:30 Pm liata tlô pi ta, TLM Guest house pha kawpa nata pathaih kawpa liata miah ama patlôsa. Purulia TLM heta su nata râhzy hnei pha kaw ta, TLM Hospital nata Mercy Home chhao a hnei hra. He su liata Hospital nata Mercy

Home he phawhpazy mohhōhna su pi via chaipa a chā. Dt. 12/12/13 my daw 7 Am ta ama chapel liata apakhyna programme hneipa chā ta, aphawhpazy nata Department staff zy nata keimo sahlaopa chhaota apakhyna aly kawpa ta eima hnei thei hra. Dr. Famkima Darlawng, TLM Hospital Superintendent ta miah chhitha ta, Rev. Lalzarliana ta Beipa bietana a reih. TLM Mizoram Team ta Krismas hla sākha eima sa hra.

Purulia TLM Hospital duasu. Purulia TLM Hospital Building he lai kaw ta, a pha kaw hra, tlāhleipa 400 rachhōh y theina room ahneipa a chā. Hriatuhpa: Doctor 6, Nurse 14, Other Staff 96 ama chā. He TLM Hospital mohhōh nawpa chāta kō kha ta phusa byuhpa cha Rs. 32,500/- Lakh rachhōh a chā.

Purulia Home duasu. Mercy Home chhao he Building zy pha kaw ta, a paroh kaw. Nōpi pawpi viapazy sopakhyna su chā via ta, chhōhkha ngai awpa a hnei khao leipa, ama chhōhkhazy ta ama pathlua hapazy cha thi hāpa ta he opi he ama hā thlāh haw. Chyhsa phapa nata pathaihpany a viasa awpany hmō beih khao leipa ei ta, ama viasa pha chaipazy cha ama Campus liata Azyh (monkey) zy nata pazu-pawwzy cha nohchareih viasa phapa hawhta hmia ama hmō theipa nata ama palaolāh theipa y chhōhpazy tlā a vaw chā. Abeipa ta eima rāh liata phawpa hrizy ta miah ā ngia hnao lei nawpa ta a ku miah a pazawh khāhpa Awnanopazy heta phawhpa pasana ta a patu ha penawh sapa nata thlahpa pachhana raihria he eima

chakaona zie awpa châ flai vei ma? Pachâ pasia tua rai. Hmo lychhieh ngaitapa, hmo miakha phawhpazy mohhõhna su tly awpa ta eima sie awpa vâta, Local Church thokha nata mopakha phahnaingiahna tawhta phusa ama vaw baona sôh chhao a ry liata palâsapa hawhna heta rairuahpa a châ. A vaw pietuhpa Local Church nata mopakha hnohta Abeipa Zisu Krista mohta alyna bie ei reih.

- (1) Bankura Mercy Home liata a ypazy Krismas amâ ly nawpa ta Rs. 10,000/- piepa a châ.
- (2) Mercy Home liata tlâhleipa a ypa zydua hnohta mopakha Rs. 100/- sai piepa a châ.
- (3) Purulia Hospital liata tlâhleipazy ta Krismas amâ ly nawpa ta Rs. 10,000/- piepa a châ.
- (4) Purulia Mercy Home châta Rs. 10,000/- piepa a châ. A tlâhleipazy hnohta Rs. 100/- sai piepa a châ.
- (5) Kolkata Hospial liata tlâhleipazy châta Krismas tao nawpa ta Rs. 20,000/- piepa a châ. Tlâhleipazy hnohta Rs. 100/- sai piepa a châ.

Purulia Station liata tao byuhpazy eima tao khai tawhta zâlâ daw 3:30 Pm-pa ta Purulia puasaipa ta Kolkata lâ vaw sie pi ta, Zâ daw 10:00Pm ta Kolkata Howrah Train Station tlô pi ta, TLM lia hriatuhpa pakha ta miah vaw dy ta, eima tlô nawpa su raopa Seva Kendra Training Center 52-D, Radhanath Chowdhury road liata eima tlô.

Dt. 13/12/13 my daw 8:00Am-pa liata Kolkata TLM Hospital eima tly heih. TLM Hospital liata hriatuhpazy nata

meeting hneipa châ ta, TLM Hospital duasu tlâhpi-pazy Slight Projector hmâpa ta miah ama pamosa khai tawhta tlâhleipa hmazôh phaohpazy eima hmô nota eima râh vâhneina nata Khazohpa ngiachhiena eima to patluazie palôh lia â vaw lâ pasia kaw.

Nohchhô daw 12:00 noon-pa ta Krismas Advent programme hmâhkhoh awpa ta miah ama hruana hawhta aly kawpa ta daihti hmâpa a châ. Rev. C. Biakmawia ta Abeipa bietana a reih. Eima daihti pachhâsa tawhta pati nie awpa amâ chhuahnohpa cha aly kawpa ta dôhkhohna hneipa a châ.

Zâ daw 9:00 Pm liata Team memberzy ahmôpakhyna daihti hneipa châ ta, hmo eima hmôpazy tawhta eima palôh lia â vaw lâpa reina (sharing) hnei pi ta, thlahchhâ paraohna hneipa ta Kolkata liata zâ eima hmâh hnôh chaipa daihti cha aly kawpa ta pachhâsapa a châ.

Zawtheina ticket eima hmô theina dâh â lyu lei vâta Dt. 14/12/13 noh ta manôh 9 cha Air India lia a kaw zaw ei ta, Dt. 15/12/13 ta manôh 9 zy cha Jet Air ways liata amâ kaw zaw hra. A palâ kawpa ta Aizawl eima kaw tlô khai theipa vâta eimâ ly ngaita.

Dt. 16/12/13 my daw 11Am-pa ta The Leprosy Mission Mizoram Office Aizawl liata TLM Annual meeting hneipa châ ta, biepathlupa peimawh kawpa sâkha cha, *“TLM Mizoram heta Purulia Center liata hriatuh awpa Mizoram chyhsa Missionary pakha tuapa châ mawh sy’* tahpa a châ. Eima châta thlah miah vaw chhâpatuhpa zydua hnohta alyna bie ei reih.

ALYNA BIE REINA

Biehmia. Tanoh Moria Local Church ta Achhyna o sa nawpa ta Fund Raising Camping pachhuhpanohpa liana he alyna bie rei awpa hluhpi eima ECM Headquarter nôpaw penawh liata Moria Local Church ta eima hneipa ta eima pahno. A viapachaipa ta Biatuhpa Rev. Phosa Chozah, Pro. Pastor Beingachhi nata Rev. T. Salaw, Executive Secretary (Misn) chô liata eimâ ly hmeiseih. Beipa ta ama raihria chakaona liata byhnâ hluhpi pie mawh sy.

Eima Awnano duasu. Kô 2002 March, 12 liata ECM Kaochao 'E' Local Church mohhôhna ry liata Preaching Station, Matu vaih tahpa ta paduapa châ ta. Cha liata chhithatuhzy cha, thokha thina lytlâh khôpa ta y ei ta, thokhazy deikua cha pension piepa châ ei ta, tahmâ deikua Local pitlohpa ta pa-îpa a vaw châ haw. He Local pitlohpa ta a yna daihti he Dated 14th August, 2011 liata Moria Local Church tahpa ta paduapa a vaw châ haw.

Chavâta Achhyna o sa nawpa ta Fund Raising ECM Local Church to ta siepapua awpa ta eima pachhuhpanohpa he, Preaching Station daihti liata Achhyna o sa chiehpa tanoh taihta eimâ ngiapâ ngâthlâh hapa he Local Church Committee ta vaw pachâ ta, Headquarter nôpawzy a saohiahpa ta Fund raising he pachhuhpanohpa a vaw châ haw.

Chavâta Achhyna o sa nawpa ta Lucky Ticket pachhuhpanohpa châ ta, pahnaingiah kawpa ta o dyh to

ta sakha (1) sai rie maniah nama chalei awpa ta Beipa moh ta eimâ châ haw. Tloh lei ngaita kawpa ta ECM Local Church to ta Ticket zuah awpa ta sie papuana eima vaw hnei daihti lia chhaota a byuhna hawhta chakaona daihti ECM Local Church to ta sai maniah nama hei chyu awpa ta Beipa moh ta eimâ châ haw hmeihseih.

Achhyna o eima sa thei cheingei nawpa ta thlah khâ maniah nama chhâkhei awpa ta eimâ châ haw. Beipa ta byhnâ hluhpi cha pie chyu mawh ei sy.

Machâ L. Vakhu
Secretary,
ECM Local Church, Moria



Taokheina.

**MACHÂ NC. MATLÔ (L) EIMÂ
CHHAIH HAW**

Machâ N. Khailua
Asst. Secretary,
Tisi Local Church

Machâ NC. Matlô, a paw Laitu (L), a nô Khochhai (L) he 1953 April liata vaw pih ta, unawh pilah pathôh nata sieta pakha a hnei. 1980 liata Mano Kiazoh nata ahnei ei ta, vâdua a chhih kawpa ta a lahpi ta 1992 lia a pahâsai ta. Tahmâ ta a lahpi M. Sova nata 1993 liata ahnei heih ei ta, a lahpi nawh liata sawchapaw pathôh nata sawchanô pathôh ama hnei.

Kô 1975-1978 chhôn ta Lôbô Middle School liata Headmaster vaw châ ta, kô 1979-1990 chhôhta Theiva Middle School liata pachutuh vaw châ heih ta, kô 1990 tawhta atanoh taihta Tisi Middle School liata pachutuh rai a hria ngâhaipa a châ.

Kô 1966 liata Pastor Chhôihei ta Bati pachâsa ta, kô 24.12.1978 zâ daw 12-pa ta Krista pihna Drama amâ châpa tawhta a vaw pihpathipa a châ. Kô 1985 Theiva liata a y no ta Amôbyuh Pastor Bia ryureina liata Kihchhôn Machâ châta lapa châ ta, kô 1996 December liata Presbytery Ryureina Tisi liata Machâ châta Ordained-pa a châ.

Awnano liata maohphaoh nata tovyuh vaw hnei tyhpazy:

1. 1990-1999 - Local Church Asst. Secretary
2. 1999-2005 - Local Church Secretary
3. 2005-2007 - Local Church Fin. Secretary
4. 2008-2014 - Local Church Secretary
5. 1991-1998 - S/School Pitlohpa Pachutuhpa
6. 1990 - S/School Secretary
7. 2004,2013 - S/School Superintendent
8. 2006 - KNP Advisor, TLM Chairman
9. 1992 - Local Mission Board Secretary
10. 1995 - Local Planning Board Secretary
11. 1997 - Building Board member, BSI Collector
12. 1999-2001 - Tipa Pastor Bia Asst. Secretary
13. 2002-2004 - Tipa Pastor Bia Secretary
14. 2006-2009 - Tisi Pastor Bia Secretary
15. 2004-2005 - Assembly Mission Board member
16. 2008-2009 - Assembly Pastoral Committee member
17. 2010-2011 - Assembly Executive member
18. 2011-2012 - Presbytery Auditor

Awnano ahmâna peimawhpa liata Director/Chairman nata Speaker ta eima hmâ chai tyhpa hry liatahpa châ ta. Awnano nata khihtlâh châta apasaihpa, chyhsa riahpha, hmopha viapa ta a pahnopa liata cha apachâna riahpha kawpa ta apanano ngâhpa chyhsa, chyhsa apaly-pauasa thaipa, awnano athikhei/hrokhei ngâhpa, chyhsa tiamapa, chhõhkha avaona liata amopâ tlâh a châpa, awnano nata

khihtlâh liata biechhie/biepha liata nôpaw miah a châpa tyhpa cha Dt. 10th March, 2014 liata motor Accident liata a vaw hlao hra ta, Siaha Hospital liata thla 2 chhòh mohhòhpa vaw châ ta, Dt.15th May, 2014 ta Lolei lâ siekheipa châ ta, 19th May, 2014 liata pasai leina chòta rôhnahna râh lâ miah a siesai haw.

Dt. 20th May, 2014 zâlâ daw 2.00 pm ta pathliena nata pabuna programme o su liata hmâ pathaopa châ ta. Biatuh Pastor, Rev. C. Beizaw ta pabuna daihti hmâh ta, Rev. MC. Zahluna, Chaplain ECM Hospital ta bietana rei ta, chakhai nahta Machâ zydua ta a ri apupa ta achhyna o lâ apakhykhei awpa ta pangai kheipa a châ. Pro. Pastor M. Beichi, Biatuh chhihthana liata a rôhnah kawpa ta apakhyna programme hmâpa châ ta, Rev. NC. Vabeilua, Aizawl Biatuh nata Administrative Secretary ta bietana rei ei ta, chakhai nahta thlâ su lâ chhihthapa ta pabupa a châ.

He vâduana eimâ tyhna liata khi hrolâ tawhta ri a vaw kiahpa zydua thlahchhâna nata kao nano nanopa tawhta baona eima hmôpa zydua nata miah a taokheipa zydua hnohta Tisi awnano ta nama chò liata alyna bie cha hlâ pi ta. Beipa ta nama chakaona nata nama hmopha taona liata sapa nata thlahpa liata byhnâ cha pie mawh ei sy tahpa he eimâ khokheina nata thlahchhâna a châ.



**MACHA MC. MALSAWMA (L) EIMA
CHHAIH HAW**

Machâ N. Chisa
Awnano hyutih,
Amobyuh Vaihthieh

Machâ MC. Malsawma he Puhpa Bualsiana (L) nata Pihnô AZ. Tialchhani (L) nôvah likawh liata sathei pathôhna châpa ta Dated 5th March, 1960 liata Amobyu CH liata a pihpa châ ta, unawh pathôh nata sieta pano a hneipa a châ. Dt. 15.09.1997 liata pihnô K. Lalliani nata ahnei ei ta. Sawchapaw pakha nata sawchanô pano ahneipa ama châ. Dt. 24.10.2002 liata K. Machâ châta pa-îpa châ ta, Dt. 28.12.2013 liata Awnano Machâ châta chahnaopa a châ.

Awnano liata a chakaonazy:

1. Local Church Auditor
2. Church Building Board Chairman nata Secretary
3. KTP Branch President
4. Local Church Mission Board Secretary
5. HCF Advisor
6. Local Church Finance Secretary
7. Sunday School Secretary
8. BSI Amobyu Area Exe. Committee member raizy he tiama kawpa ta a vaw hria tyh.

Khihtlâh châta a chakaona . Primary School nata Middle School paduana kyh liata hmia a sah tua lymâpa châ ta. Tahmâ taih chhaota Middle School, Amôbyu Vaihthieh liata W.E Teacher rai a hria ngâhaipa a châ.

A Sermon hnôh chaipa. Bible, Philippi 3:16 bie he atlychakapa ta, Krizyh chhôhkhazy pi heta Beipa eima chakaona liata, kao to liata hmia eima tôh ymâ awpa a châ tahpa he a sermon hnôh chaipa a châ.

A daihti hnôh chaipa : Machâ MC. Malsawma (L) he pangiasa pha leipa ta a hmôkhaw liata alô ypa hmô papuapa châ ta. June 2014 liata Aizawl lâ â awpa hnabeiseihpa ta sie ta, châhrasala seat a to thei leipa vâta a khy chy ta, chiehleina nanopa ta â bai via lymâpa vâta Dt. 25.08.2014 noh ta Civil Hospital, Siaha lâ pangai kheipa châ ta, he noh zâ dawh 10:00 Pm ta a pasana tao thei khao leipa ta a chakaopa Beipa hnohta maniah â pahâsai haw. A siesaipa a lahpi nata sawzy thlah khâ chhâkhei chy u.



**UPA T.H. HMINGMUANA (L)
KAN THEN TA**

Tual Upa S. Ngohei
ECM Local Church,
New Saiha

Upa T.H. Hmingmuana (L) hi Pu Tialphunga (L) leh Pi Sunpari (L) te fa 12 zinga upa lam atanga chhiara 5-na ni turin kum 1951 ah Saikah khuaah a lo piang a. An unau hi mipa 8 leh hmeichhia 4 an ni. Kum 1967 ah Rev. V. Lalzawnga, BCM Pastor in Baptisma a chantir a. Kum 1974 ah piantharna a chang a, Dt. 1.7.1977 ah H. Hrangnguri nen inneiin fa mipa 2 leh hmeichhe 3 an nei.

Zirna leh hnatawh lam : Zirna lamah BA niin, kum 1986 ah khan PWD ah ADA in a lut a. Hun engemaw chen a thawh hnuin Electric Department-ah sawn a ni. Electric Department-a a thawh lai hian Divisional Accountant ah kaisangin PWD ah sawn a ni leh a. Chumi hnuah Electric Department ah bawk sawn a ni leh a, hetah hian a pension thlengin a thawk a ni. Kumin February thla khan a hna atang hian a pension ta a ni.

Kohhran lam : Kum 1990 ah ECM New Saihaah Tual Upa atan induct a ni a. Dt. 5.12.1998 ah Upa atan College Veng Biakinah Rev. Ithra Tluma in a Ordained a ni. Kohhrana nihna a chelh tawh te.

1. Tualchhung Kohhhranah Finance Secretary, Assistant Secretary
2. Local Mission Board ah Chairman
3. Building Board ah Vice Chairman leh Chairman
4. New Saiha Pastor Bialah Treasurer
5. BSI Saiha Branch ah Finance Secretary leh Treasurer
6. ECM Assembly Auditor
7. Bible Society Chief patron te a ni.

A hun tawp lam . Dt. 13.5.2014 ah khan Aizawl lamah inentir turin a kal a, chutah chuan Cancer a vei a ni tih hmuhchhuah a ni a. Mahse, Cancer enkawl na han la turin a taksa a chak vak loh avangin Saiha lamah an rawn let leh a. in lamah hun engemaw chen theih ang anga an inenkawl hnuah Dt. 24.8.2014 atang khan a lo chau zual ta a. Dt. 25.8.2014 zingah khan ECM Hospitalah admit a ni a. mahse a natna chu he khawvel thiamna hmanga chhan theih rual a ni ta lo va, tlai lam dar 5 ah khan a rawng a lo bawl thin Lalpa hnenah chatuana chawl tawh turin min lo kalsan ta a ni.

Thuchah hnuhnung . Kan Kohhran New Saiha mipuite hnena a thuchah hnuhnun ber chu Dt. 2.4.2014 zingah *"In kawngte chu chhut ngun rawh u"* Haggai 1:5-7 thu hmangin duhsakna min hlan a ni.

Upa T.H. Hmingmuana hi a that lai hunah chuan Kohhran leh khawtlang tana mi tangkai leh thahnemngai

tak mai a ni a. Tuna kan Biakin sak mek hi ama thahmenngaihna avanga tun dinhmun hi thleng thei a ni, ti i la a soal lovang. Vawiina ama vuina buatsaiha, Lal Isua lo kal leh hma zawng ama hmuh tawh lo tura kan thlah liam ta mai hi Kohhran leh khawtlang tan channa nasa tak a ni.



KRIZYHPA CHIAHMIE
REGD.NO.NE. - 394 (MZ)

If undelivered please return to
E.C.M. Office Siaha P.O. Saiha - 796901
Saiha District, Mizoram.

A m ā bu 1 Rs. 20/